

古
微
堂
集

古微堂集外篇

卷一目錄

說文擬雅敍

說文轉注釋例

說文假借釋例

說文會意諧聲指事象形釋例

庸易通義

書古微序

書古微例言上

書古微例言中

書古微例言下

詩古微序

董子春秋發微序

小學古經序

大學古本序

孝經集傳序

曾子章句序

子思子章句序

論語孟子類編序

孟子小記

兩漢經師家瀛攷序

學校應增祀周公議

卷二目錄

孔子年表

孟子年表

孟子年表攷第一 趙集

孟子年表攷第二 趙齊

孟子年表攷第三 齊宋薛鄭滕公

孟子年表攷第四 紀年孟子長編

孟子年表攷第五 生卒著書

論語三畏三戒九思箴

孔孟贊

曾子贊

顏冉贊

孟子補贊

周程二子贊

程朱二子贊

朱子贊

陸子贊

朱陸異同贊

楊子慈湖贊

王文成公贊

明儒高劉二子贊

卷二目錄

皇朝經世文編敍

明代食兵二政錄敍

聖武記敍

海國圖志敍

擬進呈元史新編敍

元史大理傳敍

關中形勢論

王翊符堅論

趙汝愚擁立寧宗論

書遼太祖事

書金史完顏宜傳後

書宋名臣言行錄後

再書宋名臣言行錄後

書明史藁一

書明史藁二

書趙校水經注後

老子本義序

孫子集註序

國朝古文類鈔序

簡學齋詩集序

詩比興箋序

地理綱目序

支隴承氣論序

武進莊少宗伯遺書序

定齋文錄敘

章教諭強恕齋書序

淮南鹽法輕本敵私議自序

卷四目錄

苗疆 敕建傅巡撫祠碑銘

陝西按察使贈布政使嚴公神道碑銘

太子太保兩江總督陶文毅公神道碑銘

兩淮都轉鹽運使婺源王君墓表

戶部左侍郎提督江蘇學政周公神道碑銘

湖北崇陽縣知縣師君墓誌銘

廖含虛先生墓誌銘

張鐵甫墓誌銘

李希廉墓誌銘

湖南按察使贈巡撫傅鼎傳

歸安姚先生傳

武進李申耆先生傳

荆溪周君保緒傳

卷五目錄

釋道山三條四列

釋道山北條陽列

釋道山北條陽列二

釋道山北條陽列附

釋道山北條陰列

釋道山北條陰列二

釋道山南條陽列

釋道山南條陰列

釋道山南條陰列附

釋道北條弱水黑水

釋道南條九江

釋道南條漢水

釋道南條三江

釋雲夢

釋江源

卷六目錄

籌河篇上

籌河篇中

籌河篇下

畿輔河渠議

上陸制府論下河水利書

再上陸制府論下河水利書

湖廣水利論

湖北隄防議

江南水利全書敘

東南七郡水利略敘

三江口寶帶橋記

卷七目錄

籌漕篇上

籌漕篇下

海運全案序

海運全案跋

道光丙戌海運記

復魏制軍詢海運書

復蔣中堂論南漕書

上江蘇巡撫陸公論海漕書

錢漕更弊議

籌鹺篇

淮北票鹽志敘

上陸制軍請運北鹽協南課狀

卷八目錄

城守篇

軍政篇

軍儲篇一

軍儲篇二

軍儲篇三

軍儲篇四

坊苗篇

湖南苗防錄序

乙丙湖貴征苗記

答人問西北邊域書

廬江章氏義莊記

南邨偶耕圖記

剗股對

海曙樓銘

復何竹薌同年論會計書

與曲阜孔繡山孝廉書

與涇縣包慎伯大令書

古微堂外集卷一

說文擬雅叙。

邵陽魏

金壇段若膺先生說文解字注曰。小學家六書綱領不出形聲誼三端。說文形書也。爾雅誼書也。玉篇廣韻音書也。而說文一書。囊括有條例。注說該六藝。今世學者苟能取其得聲之字。照十七部兼用四聲。分爲韻譜。則其部之界畫勝廣韻遠矣。苟再有其人。取其專訓本誼之篆注。分類部居。則其條理之精密過爾雅遠矣。源考說文古音分十七部。僅段君一家之言。與顧氏十部江氏十三部孔氏十八部王氏二十二部劉氏二十六部互有詳略出入。且吳江鉅氏元和江氏均已依其部分。著書刊勅行世。惟以誼分類合說文爾雅爲一者。世間尙無成書。爰以治經之餘力爲之。三月而告成。以天地人物事五大類括五百二十三部。而於各部之中。有不得不異于爾雅者。爾雅有釋親無釋人。故五官

四肢五事五倫五性最廣之字。皆無類可歸。盡入之釋詁。而釋詁一門。遂擁厯雜沓。不便稽檢。此書別立釋人。綱舉目張。與天地事物方聚族分。此其善于爾雅者一也。爾雅不盡用字之本誼。專取段借。故六書之本義不明。今專以部首分類。而以其虛文語助爲釋言。別輯其專行借誼反廢古誼者爲釋詁。並將說文分部之失。如口句之以亦聲立部首。笑與哭不同入大部。告不入牛部。家不入山部。后詔司不入口部。珏不入玉部。章不入邑部之類。今並更正。此其善於爾雅者二也。別爲轉注釋例。段借釋例。意聲事形釋例三篇。以冠於首。與段君之註亦多相失。故各類中止載原篆原注。而不采諸家之注。意主告蒙。且便自檢閱。而不敢當董理之任。至於本此三例發明而擴大之。以俟後之君子。咸豐元年邵陽魏源序。

說文轉注釋例。

周官保氏以六書教國子。漢書藝文志曰。象形會意指事諧聲。轉注段借。造字之本也。象形指事會意諧聲。皆無異義。獨轉注段借頗多歧解。昔人有反正爲

乏反存爲在。謂之轉注之說。然此數字外。更無可證。近人知其不可通。於是段氏本其師戴氏之說曰。轉注者。猶言互訓也。以老注考。以考注老。展轉註釋。是爲轉注。惟象形會意指事。諧聲爲六書之體。而轉注段借則六書之用。而力闢漢志六者皆造字本之說。又以爾雅爲轉注之書。而初哉首基。啓祖元胎。俶落權輿。始也。卽以始字爲建類一首。互相訓釋之義。然初哉首基等。可訓爲始。而始不可爲初哉首基。烏在其爲考老之互訓也。推之而弘廓宏溥。介純夏廡。墝墳。墳。墳。不奕洪誕。戎駿假京。碩冢劉將。席。可訓爲大。而大不可訓爲夏廡。墝墳等十餘字。賚貢錫畀。予貺。可訓爲賜。而賜不可訓爲賚貢錫畀。衍豫妣般。可訓爲樂。而樂不可訓爲衍豫妣般。邇邇率循。由從。可訓爲自。而自不可訓爲邇邇。由從。詢度咨諏。可訓爲謀。而謀不可訓爲詢度咨諏。典彝法則。可訓爲常。而常不可訓爲典彝法則。黃耆貽背。可訓爲老。而老不可訓爲黃耆貽背。妃匹仇敵。可訓爲合。而合不可訓爲妃匹仇敵。紹胤廢續。可訓爲繼。而繼不可訓爲紹胤廢續。再推之。天顛也。而顛不可訓天。元始也。而始不可訓元。禮履也。而履不可訓

禮。海晦也而晦不可訓。海。不丕也而丕不可訓。不。非法也而法不可以訓。井。秋
 犖也而犖不可以訓。秋。牛事也。羊祥也。馬怒也。髮拔也。而事祥怒拔等不可以
 訓。爲牛羊馬髮。薦藉也。而藉不可以訓。薦。樹本木名。假爲一切樹立之誼。而立
 不可以訓。樹。豎本章豎。假爲豎直之義。而直不可以訓。豎。舉爾雅一書。無非會
 意段借。無一條可指爲互訓轉注者。舉說文一書。形聲事意段借。無所不有。獨
 無互訓之誼。段君戴君徒能言之而不能指明。除考老二字之外。不知當以何
 字爲互訓。惟望塞疑惑喜樂悅懌等字。及力部之功勛勗勸勸勸勸勗。阜
 部之陘隘險阻隕隕傾墜隱蔽。絲部之綱網紀緒紹繼纏繞等字。差堪互訓。此
 外徧檢各部並無可當者。非如象形指事會意諧聲之字。部部有之。烏有此窘
 狹之義。可列六書者乎。且建類一首。謂以五百二十六部首。展轉貫注。於每部
 數百字數十字之中。故每部必曰凡某之屬皆从某。許君自敘曰。其建始也。立
 一爲端。方以類聚。物以羣分。同條牽屬。共理相貫。雜而不越。據形系聯。引而申
 之。以究萬原。畢終於亥。知化窮冥。是許君自敘一字不及於象形會意指事段

借。而惟以部類建首轉注爲六書之綱領。其綱領或在上下。或在左右。如日月金木石風土水火阜人口手足言首目骨肉毛魚虫牛羊犬豕之類。偏旁在左者皆左爲轉注。右爲諧聲。凡隹鳥皮邑攷久支戈多宅邑長永久斗戊卜支訓偏旁在右者。皆右爲轉注。左爲諧聲。凡山岫雨西高爻門曰同而网問門門一二三四亩艸竹宀穴虎隹東高厂广广自白瞿豈大先甘音且采於幸北入彖立乃之屬部首在上者。皆上爲轉注。下爲諧聲。凡其且巫几丌亏兮莖是此氏氏矢止巳支乙壬韭白丰寸皿豆丹用重共見至王丁部首在下者。皆下爲轉注。上爲諧聲。此全書之通例。卽如晦明眊眊雷雲飄颻炎燎冰凌等字。使非从日以月从風从雲从火从欠等字。何以知其屬天平。邱陵境壤等字。使非从邑从阜从土。何以知其屬地乎。江河波瀾流澗清濁等字。使非偏旁。何以望而知其爲水乎。嶽崧岐岱等字。使非部首。何以望而知其爲山乎。从艸从木从竹从鳥从隹从魚从虫从龍从犬馬牛羊之字。使非偏旁。何以知其飛潛動植乎。从金从石从玉从革从韋从絲从衣从亾之字。使非偏旁。何以別其何物何器。

乎。以心以毛以彰以耳以目以皮以骨以肉以頁以面以手以足以子以女以人之字。使非部首。何以辨其何形乎。舉五百二十六部。無一字使能出部首之外。故形聲事意等字。如人之有名字。而偏旁部首。則如人之有姓氏。而後祖宗嫡庶宗族支派。秩然其不可亂焉。又若絲網在綱。經緯錯綜。而不可紊焉。六書轉注之誼。孰大於部首建類者。而乃以互訓當之乎。以互訓當轉註。則此五百二十部首於六書屬何門。豈部首反不在六書之列乎。況以註書爲注書。起於東漢馬鄭之肱造。漢藝文志載諸經師之書。如齊詩故魯詩故韓詩故及春秋鄒氏傳夾氏傳左氏微鐸氏微張氏微毛詩詁訓傳公羊穀梁外傳公羊穀梁章句公羊顏氏記。從無有稱註書爲注者。豈周官保氏時。已知東漢註書。而預爲轉注以待之乎。爾雅水注川曰谿。注谿曰谷。注谷曰潞。注潞曰治。注治曰漬。春秋有棘章之附注及華不注之山。皆以山水得名。從無涉於註解。戴氏段氏小學專家。乃畢生不知轉注之義。可謂求之千里失之隄前。此許君轉注一首建類之義大異於戴段者也。至於許君部分亦有不盡符建類轉注之本旨。有

孤立部首凡某之屬从某而部下並無一字者。有部首下尙有數字可隸而不收隸者。有一部中忽分二字三字別立爲部而絕不解何意者。有二部三部并之實止一部者。有不以形爲部首而以聲爲部首。逮全書通例者。如彙部从回象城彙之重兩亭相對。並無隸字。何不以彙入邑部而自立部。又如鼻部之前先立自部。惟一鼻字隸之。何不以自爲鼻之部首而免立專部。后部只一聃字當入口部。何以別立部。司部止一習字。何不以司入口部。習入言部。而獨立部。珏部止一斑字。何不并入玉部而別立部。異部惟一戴字。戴當入戈部。則異當入共部。何得專立部。如母部惟一貫字。當入貝部。又虜字當入虎部。則母部可廢。尙敗衣也。卽敝衣字。从文尙聲。當入文部。何以專立部首。耑部物初生之題也。題也。題也。上象形下象根也。並無一字。案此卽端字。當歸立部。爲端之省文而廢此部首。耑部豆也。惟隸一豉字。何不與登登等字均隸入豆部。又如六部家牢皆牛豕之宮。而謂家從豕得聲。則牢之居牛又從何得聲。五百二十部中。皆以形爲部首。不以聲爲部首。何以斗旬兩部亦聲之字。獨首聲而不首形。而同聲

之字。如鉤疇筍拘糾糾等。又罍一漏十。段注不一糾其失。反曲爲周旋。如梅糾當入木部。鉤當入金部。疇當入疾部。拘當入手部。筍當入竹部。糾當入糸部。則糾句二部可廢。東部只一棘字。案棘本从章果本从木。當以棘入章部。東入木部。而廢此部首。脊禾麥吐穗上平也。部內只一彘字。卽等齊之齊。當以脊入月部。而以彘爲齊之古文。則脊部可廢。瓜部九文而瓠字獨另立部。並無隸字。殊不可解。當并入瓜部。東本木芒也。部內只瓠棘二字。考東本从木。當入木部。而此部可廢。會卽克字。肩也。象屋下刻木之形。又古文克作會。此部並無相隸之字。今緣仔肩之義。引申段借。爲克能克勝之克。應入合部。不當別立部。凶惡也。與兇懼之兇同字。何以不入口部。而別立部。又兇部只一臬字。而下棘部有棘字。臬屬。又有棘字。卽離散之散。又下爲麻部。有簾簾廢三字。當以臬及麻等並入棘部。共計八篆。不必別立部首。帛部只一錦字。考錦字從金。以其美貴如金也。當以錦入金部。而帛入白部巾部。決不當別爲部。垚土高兒。堯字从之。當并入土部。不當立垚爲部首。身从反身。只一股字。案躬亦反身。當以殷與躬軀

同歸身部。否則隸受部。而呂則躬之偏旁。皆不當別爲部。告部僅一譽字。當以告入牛部。而別立毀部。以譽字隸之。又若哭笑不入犬部。而獨以哭爲部首。僅一喪字。當歸入亾部。而笑則并不收。至李陽冰歸入竹部。改犬爲夭。謂竹得風如人之笑。有同兒戲。此并單文孤部無可轉注。不當空立部首者也。至若庚部壬部。均無一字。然廢字从庚。妊望聖任衽任衽等字。从壬。何以不爲收入。此又部中字之應收不收者也。至於宀部七十一文。而宮營二字獨別爲部。山部五十三文。而岫崬二字鬼巍二字各爲一部。又岸崖崔崩崕五字。並从山而不入山部。均不可解。宜并入山部。此小部之當歸入大部者也。此皆與許君部首建類轉注之誼。未能盡合。自敍望後人董理者。意在斯乎。意在斯乎。

說文段借釋例。

問轉注之說。戴段全非。至於段借之誼。亦有可議乎。曰。段借之說。段君言之。雖深悉其本原。而未旁通曲暢其族類。段君說文注曰。段借放于古文。本無其字之時。許書有言以爲者。有言古文以爲者。以用也。能左右之曰以。凡言以爲者。

用彼爲此也。如來周所受瑞麥也。而以爲行來之來。鳥孝鳥也。而以爲鳥呼之鳥。古文霸神鳥也。而以爲朋黨之朋。子本冬月陽氣動萬物滋也。而人專以爲稱。章相背也。而以爲皮章。西鳥在巢上。即古而以爲東西之西。許書言以者凡六。是本無其字。依聲託事之明證。本無來往字。取牟麥字爲之。及久但知來往借誼。而本誼反廢。此許說假借之明文也。其云古文以爲者。酒下云古文以爲灑掃字。疋下云古文以爲詩大雅字。互下云古文以爲巧。取下云古文以爲賢字。炭下云古文以爲魯字。哥下云古文以爲歌字。諛下云古文以爲頗字。周下云古文以爲甌字。爰下云古文以爲車轅字。敵下云周書以爲討字。疑即無過此皆所謂依聲託事。而來鳥朋子章西六字不同者。本有字而代之。與本無字有異。然或假借在先。製字在後。則假借時本無其字。非有二例。惟前六字則假借之後。終古未嘗製正字。後十字則假借之後。中古遂有正字。爲不同耳。詩書又有引經說假借者。如攷人姓也。而引商書無有作攷。謂鴻範攷攷爲好也。攷攷同聲以攷爲好如以攷爲治莫不明也。而引周書數重莫席。謂顧命莫爲蓐也。望

古文塗。以土增大道土也。而引唐書朕豐譏說殄行。謂堯典段塋爲殄也。圉同
行也。而引商曰圉圉升雲。半有半無。謂洪範段圉爲駟驛也。枯莖也。而引夏書
維菌輅枯釋之。謂禹貢段枯莖之枯爲木名也。此皆許稱說段借。亦由古文字
少之故。與古文以爲者一例。大抵段借之始。始于本無其字。及後既有其字矣。
而多爲段借。又其變也。後代譌字。亦得自冒于段借。博綜古今。有此三變。此所
謂無字依聲者也。至於經傳子史不用本字而好用段譌字。此由古書不盡著
竹帛。口授方言。轉寫變易。許君每字以形說其制字本義。而其用本字之聲不
用本字之義者。乃可定爲段借矣。源按用本字之聲而不用其本義者。固不可
枚舉。卽古文有此字而終不制字者。亦不可枚舉。何拘拘於說文六字十字之
間乎。有引伸之段借。如號令之爲令長。長短之爲長幼。君長。本義與引申之義
並行。推祖考之考。段爲考成。考索之考。攻玉之理。段爲義理之理。道路之道。段
爲引道。天道王道之道。途路之路。改訓爲大。而爲路門路寢路車之路。土圭測
景之圭。段爲王侯執玉之珪。子孫之孫。段爲孫讓之孫。介本大龜而段爲耿介。

之介。井本水泉。段爲井法之井。豈字古文以、爲火以呈爲盛火之器。後人段爲家無二主之主。別作炷字代之。而主之本誼廢。又如能本多力之熊。爲本好動之獠。猶本多疑之罍。而段作能敏之能。作爲之爲。謀猶之猶。若治若沽若濟皆水名。通段爲漕治沽鬻濟渡之誼。而本義皆廢。易卽蜴字省文。而段爲變易移易易簡之易。鬯本鬱酒升香之器。而段爲一切鬯茂網罟之義。於本旌旗之旂。而段爲語助之於。於戲之於。等本竹梢相平。而引申爲等齊等級之等。第本草之相次。而引申爲一切次第之第。又段爲居第之第。貫本象以物串貝。而段爲貫通之貫。克本肩也。緣仔肩堪任之誼。段爲克能克勝培克之克。南方有大象。不得見。擬其彷彿曰象。因段爲一切形象之象。豫亦大象而段爲豫大之豫。象本豕形。而段爲爻象之象。美本羊羹。而段爲一切美善之美。聿爲手持妨奪。而段爲一切攘奪裁奪之奪。喬爲大佳自田中奮出。而段爲一切奮往之奮。舊本黃離。而段爲新舊之舊。離本倉庚黃鳥。段爲離坎之離。雍本鳥名。而段爲雍和之雍。雉本禽之肥。段爲奇雉之雉。桀本雞栖木上。段爲英桀之桀。秦本秦豬。

段爲豪傑之豪特。本牛父段。爲特立之特犖。本駁牛段。爲卓犖之犖。本牛鳴。段爲牟等之牟。旄爲微外犛牛。段爲旄倪之旄。騶本牡馬。段爲陰騶之騶。騶本馬高八尺。段爲騶亢之騶。騶本鷩鳥。段爲雕琢後雕之雕。鳥本孝鳥。爲本黃鳥。而段爲鳥呼之鳥。語助之焉。以至哭笑皆犬之喜怒。段爲人之喜怒。家牢皆牛豕所居。段爲居人之家。牢籠牢固之牢。孚本雞之抱卵。段爲中孚之孚。默本黑犬。段爲墨墨無言之墨。某本甘木。因作媒與梅相通。段爲誰每之每。燕本鷗鳥。段爲燕安燕享之燕。難本雁鳥。隨陽去來。以其難至。段爲難易之難。雅本鴉也。段爲大正之正。龍本純陽之物。段爲寵光之寵。翔本鳳皇百鳥從之。段爲朋從之朋。物本從牛。大物也。段爲萬物之物。習本鳥羽學飛。段爲時習性習之習。不本鳥飛不至地。段爲一切不然之非。非本鳥飛不下。而段爲是非之非。易小過三三橫則本典則。段爲語助之則。戴本分物得異。而段爲負戴感戴之戴。曰象口出氣。因段爲言說之曰。又段爲粵爲爰。此皆有引中之段借。依聲託事。借誼與本義。

非咸字故有飛鳥象史記秦非子發馬并謂而否盧子諱詩引作飛子注非與飛古文通川亦通作並

然本火焚。段爲語助之然。

並行者也。有不依聲而从形近之段借。如巧古文以爲巧字。疋古文以爲雅字。臭古文以爲澤字。啟古文以爲澤字。啟古文以爲賢字。關古文以爲關字。肅古文以爲魯字。左傳仲子生而有文在手曰魯又有不依事而但託聲之段借。如爾本月魄而令段爲五伯之伯。榮古文以爲刊字。人名則譚兜爲譚段。丹朱一曰丹絃。阜陶古作咎絃。僕古作高。仲虺古作仲豳。罔命古爲弊命。子貢古作子贛。衛侍人癭疽卽侍人參乘之雍渠。地名則牧野古爲毋野。費誓古爲柴誓。岷山古作嶺山。許國古爲鄒國。靈臺古文作靈臺。器則犧尊當讀莎尊。此並由循包之徒。改古爲俗。而亦託於段借。乃至男女互相爾女自當作女。而段用汝水之汝。爾本介蟲而段爲爾勉之爾。此皆無引申之段借。借誼與本誼並行。終古未嘗製字者也。至於訓詁則厭有平上去入四聲。而分厭倦厭低厭壓厭惡之四義。惡有平去入三音。而分烏惡疾惡羞惡之三義。讓不改音而有推讓責讓相讓之義。敦彼行葦之敦。又爲敦盤之敦。格本長木兒。段爲感格格正格式扞格格至之格。本末原謂木根本杪。段爲一切本始末終之義。相本以目觀木。段爲相度相

與贊相之相。爲本馬病行遲。而段爲篤厚之篤。又坐營爲篤之古文。箴本綴衣之鍼。而段爲箴銘之箴。舉本日出曝曠。而段爲暴富暴虐之暴。堪本大哭與坎同證。而段爲堪能堪輿之堪。節從竹本。謂木多節。而段爲節義節制節儉之節。又或倒義互訓。論語以亂爲治。堯典以攘爲讓。易師卦以毒爲治。洪範以政爲好。詩以落爲始。以穀爲惡木。若失引申之義。大而言之。則天本蒼穹也。而引申之則失爲婁天。君爲臣天。父爲子天。食爲民天。極本屋梁居棟宇正中。引申爲北極太極皇極之極。陰陽字皆从阜。本謂山南陰山北陽。引申而兩儀四象八卦四時四方陽律陰律。以及水陰火陽否陰泰陽邪陰正陽幽陰明陽男陽女陰牝陰牡陽雌陰雄陽陽木陰木。無不以陰陽相配。再考天干地支。則甲本天干之首。而段爲甲拆甲冑之甲。由从倒甲。凡木倒甲而生。卽爲由藥。而段爲由自率由之由。丁亦天干。段爲人丁之丁。又爲伐木丁丁之丁。辛亦天干。段爲辛苦之辛。又爲更新之新。壬本天干。而段爲壬林僉壬之壬。子乃地支。孟冬陽氣之首。而段爲父子之子。寅乃地支。段爲寅畏寅恭之寅。庚本地支。段爲大橫庚

庚之庚。又引申爲廢歌廢續之廢。戌本地支。段爲征戌之戌。未亦地支。段爲未
來之未。終古文癸。象冬時水土平可揆度。因引申爲揆度揆法之揆。午本訓悟。
五月陰氣逆陽冒地而出。段借爲旁午相午之午。申七月陰氣成體。段借爲誦
申引申之申。此皆段借引申之最大者也。輒本車下兩轆。因輿中人倚轆。引申
爲倚恃專輒之輒。將本將帥。引申爲將來將請將送。又段爲鐘鼓將將之將。尊
本尊彝。段爲尊崇之尊。秀本禾穎。段爲一切秀出之秀。穆本木名。段爲於穆皇
穆之穆。填本訓塞。引申爲填壓之填。與鎖同又段爲大雅倉況之填。又爲毛傳訓
烝之填。烝。時烝也。無戎。垂遠邊也。引申爲垂天雲之垂。罪本捕魚器。从网。秦始皇以
舉文从自似皇字。改皐爲罪。辭讓之辭。本與文詞各義。而世多段辭說爲詞。字
本孔子。引申爲文字孳生之字。篆以書簡。墨以書帛。爾雅不聿謂之筆。石墨相
著而研墨。秦能書竹不書帛。是筆墨研古皆有之。因段借爲貪墨之墨。胡本牛
額。段爲胡虜誰胡胡盧之胡。納本絲濕。段爲出納之納。曾本酒官。段爲曾長之
曾。及詩似先公會矣之曾。鄭似也。會終也。謂將雉本野雞。因旁从矢。矢可度量。

段爲都城百雉之雉。脩本束脩脯也。段爲修治修能之修。胥本蟹醢也。段爲吏胥皆胥之胥。醵本豆汁。段爲醵大之醵。柰本木果。段爲奈何之柰。豈本凱旋車樂。段爲豈弟之豈。語助之豈。勿本旗物。段爲毋勿之勿。且本薦也。段爲語助進詞之且。而本頹也。象形。考工記作其鱗之而。段爲語助之而。方本兩舟相並也。字本作仁。段爲四方之方。又段爲語助方甫之乃。又段爲方殤之方。業本鎖慮。而段爲事業德業兢業之業。榮本屋脊。段爲榮華之榮。向者溺也。段爲方向之向。及向背之向。宣本宮室名。段爲宣明之宣。宋本木名。專植諸亡國已屋之社。故周封殷後以宋爲名。廉本堂隅。段爲廉節之廉。欽本欠兒。段爲堯典欽哉之欽。厥本發石。段借爲厥逆之厥。又爲其厥之厥。若本香艸杜若。段爲若順若似之若。帥本佩巾。段爲將帥之帥。常本裳衣。段爲旗常之常及五常庸常之常。矢本射鏃。段爲矢陳矢誓之矢。然本火然。段爲然諾之然。又段爲轉語之然。綱本網絃。段爲網維網紀之綱。維本車蓋。段爲四維之維。紀者絲之總端。段爲統紀之紀。纁釋爲帛色。蓋卽緞字。而段爲才纁之纁。經織縱絲也。與直橫相對。東西

爲經。南北爲綸。而段爲經綸天下之大經。萬本蟲名也。而引中爲千萬之萬。又段爲曼長之曼。孔本从乙从子。乙鳥應候至而得子。可以嘉美。因段爲一切孔美。孔大之孔。薦本鹿名。而段爲一切薦藉薦與之薦。此皆借義行而本義廢者也。說文自敘言孔子書六經。左邱明書春秋。皆以古文。其不用段借明矣。及李斯改古文大篆。程邈又改篆爲隸書。以便徒隸。而經文失真者十之二三。加以秦火斷爛之後。尙書由女傳口授。詩由諷誦竹帛。經文失真者十之四五。如尙書棧被四表。或作桃作光作充。平章作采章。便章一作辯章。平秩古作平體。暘谷作暘谷。蜎夷或作蜎峽。又作蜎。又謬作蜎。南訛本作南爲。一作南僞。一作南謬。疾謬作豐謬。民獻作民儀。盟古文盟。象明神在上。以血盛牲血。孟諸一作盟諸。孟津一作盟津。又唐虞三代無儀器。故堯典授民時。專觀天象。斗極旋繞北極。樞機。而後人段爲璇璣。又作璿璣。以配玉衡。因謂以玉飾銅儀。以漢世機巧。竈魁之器。施諸上古。是誤認段借爲本義。而正義反廢。推之割訓。害。班訓。得。孟訓。勉。寡訓。願。虛爲旅。訟爲頌。順爲訓。美作儼。亦作媿。巽作孽。尙書周易合。

古文之異同。再推齊魯韓毛詩。谷與穀。格與假。鑒與監。訓勤。節作屆。提作提。共與供。留黎爲流離。逶遲爲郁夷。樂飢爲癯飢。樂與同字倬段爲到。永段爲豫。蜂首爲顙首。皆三家詩異文。爾雅注疏引證孔繁。遽數之不能終其物。此並同聲假借之例。本有其字。不用本字而專用他字。或與本義並行。甚至本義反廢者也。至漢志小學家有別字十三篇。不入六書之內。以其無義可引申。遂不成字。而亦自附於假借者。如漢碑雖國姓廟號官名。皆可冒濫。歐陽作歐陽。中宗爲仲宗。縣令爲縣苓之類。洪适隸釋卽已斥之。又碑文易之竟陸乃堯陸之譌文。而說文中亦有俗體。許君濫收者。如某旁加木爲杲。杲旁加口爲囁。尊旁加木爲樽。牯犛字之加牛。噤字加口。此與馬頭人爲長人持十爲斗何異。皆必當芟蕪之字。而人之爲篆書者反以其見於說文而遵之。至于劉金刀國姓。而必改書爲錕。潮字本於江漢朝宗。乃以說文所無而改書爲淖爲濤。是雖其所俗而俗其所雅也。甚至尙書皋陶謨七始詠。譌爲黎始。又譌來始滑。又譌采治忽。盤庚篇今予其敷心優賢揚歷。而馬鄭古文譌爲今予其敷心腹腎腸。易雜

說文會意諧聲指事象形釋例。

說文之字。以轉注假借爲最廣。五百二十六部。無一字能離于部首之轉注。與偏旁之諧聲者。惟諧聲有專諧聲不會意。及諧聲兼會意之不同。諧聲不會意之字。五百部中不可枚舉。其諧聲兼會意之字。不如專聲者之廣。且其解說之

誼卽說文亦間有未得制字本意者。如父母母三字。說文訓父爲以手持杖。母從女有二乳。母象女有奸之者禁止之。母令奸。然父之治家豈僅恃持杖者。誼似淺狹。今考父从八从父。八者陰陽所以分別。父者陰陽所以交會而生子。故爻交字皆从父。母者母訓子之聲。故爲禁止詞。母字說本又如地池馳施等字。皆从也得聲。似有施布向外之誼。豈有如說文訓也爲女陰之理也。音與者同部。與地池馳施不同部。何以諸字皆从也字得聲。不能解也。說文以江河二字示諧聲之例。考江紅虹鴻紅杠扛貢攻空功巧等字。皆从工。貢者上供之義。與工同用。空者化工太空之義。而攻功巧並言工上之力。惟此四字兼聲與意。而巧則从彐得聲。餘皆有聲而無意也。河阿哥何珂訶訶訶訶訶奇等。从可之字。亦有聲而無意。而奇則並不諧聲。與从也諸字同例。皆所未曉者。推之義儀蛾與譌訛同聲。彼陂披破婆波頗皆从皮得聲。而除義儀外。餘皆有聲而無誼。崇棕淙皆从宗得聲。終零絃等皆从冬得聲。惟終兼聲意。考諸聲不會意之字。百二十部中。不可枚舉。今專求其聲意兼得者。惟冲盅仲忠仲皆从中。

聲義。

同姓
字悽

滋孽皆从茲得聲義該該該該該該皆从亥得聲義

也 疾 月
寺 部 恒

所字以智成終故于亥悒爲大天生門長乾之爲新亥亥方者也

侍時詩時特皆從寺得聲義。

延 爲 禮 法

碩頤頤。皆訓大頭。從頁得聲。義句

拘拘。筍鉤。唯。舛。以。句。得。聲。誼。

何亦以何之

縣設
取可
山鉤
園勒
勾以
曲我
繞解
俗者
與
同
章
句
者
器

价玠界並从介。大得聲。義糾从斗。互

得聲義。濡懦懦。均从需得聲而誼不同。儒取需用之。需席珍待聘。爲國儲材之。

誼。逾踰愈瘡。皆以愈得聲義。粥粥皆以弱得聲義。推之。自私爲人。反正爲乏。

敵以兩已相背爲亞。惡以兩弓相背爲亞。兩颺相背爲鄰。邑兩臣相背爲亞。此


皆相反相通之誼。至若卯爲春門萬物以出其字。从卯酉爲秋門萬物以入其

字从𠂔。此皆會意之字。𠂔可通爲𠂔。而鄭以𠂔谷爲卯谷。讀爲昧。

谷。此如漢人譌呼卯金爲卯金。形與誼俱相反。斷不可認會意爲假借也。又其

制字會意。有兩字合爲一字。如珏。卽棘林艸叢觀之類。有三字合爲一字。如𡵓。

爲栗。奔爲奔。蹶爲蹶。一从木爲𣎵。𣎵爲𣎵。𣎵爲集。𣎵爲原。𣎵爲多語。又

有四字合爲一字。如器器器從四口。詩我姑酌彼金罍。籀文作象雲雷之形。

又鐘鼎款識。囑爲古文雷。又木部。𣎵爲藥之古文。𣎵爲𣎵之籀文。又𣎵从四工而爲𣎵。又𣎵古文以爲討字。卽書無佚篇。譌張幻之譌。拳勇之拳。古文作𣎵。𣎵爲𣎵。卽𣎵字。此並見說文。有會意無諧聲者也。至於指事之字。自人言爲信。止戈爲歪外。如上下左右前後東西南北春夏秋冬青赤白黃黑玄之類。皆指事之字。爲例不多。其象形之字。則篆文皆爲隸變。失其真形。如○凡皆象形。自隸變爲日月而不形象矣。艸木皆象形。自隸變爲草木則不形象矣。鳥鳥皆从兩足象形。自隸變爲鳥从四足。則不象形矣。爲本母猴象形。自隸省作爲。則不象形矣。𣎵本陽鳥。其乙象飛形。自隸變爲燕。則又不象形矣。此六書大概。姑述其畧。以告童蒙小學之士。

庸易通義

謹案中庸之義。全通平易。而未發之中。立天下之大本者。原於易之何思何慮。各經所未泄之蘊。迥異大學以意心身爲家。國天下之本。蓋彼爲入學之門子言。乃文行忠信詩書執禮之事。未及於盡心知性知天之事也。

論語與弟子言從不及易。卽孟子七篇曾子十篇亦未嘗一言及易。所謂性與天道不可得而聞者也。所謂子罕言利與命與仁者也。安溪李氏深於易。故其中庸餘論於首篇專以易道發揮之。可謂精微廣大曲暢旁通。予故廣李氏之義於中庸之通易者。標舉數章於後。

易無思也。無爲也。寂然不動。感而遂通天下之故。非卽喜怒哀樂未發謂之中。發而中節謂之和。爲天下之大本達道者乎。

易曰復其見天地之心。豈非中庸以莫見乎隱莫顯乎微微慎獨之心體乎。君子學以聚之。問以辨之。寬以居之。仁以行之。非卽博學審問慎思明辨篤行者乎。

元者善之長也。亨者嘉之會也。利者義之和也。貞者事之幹也。君子體仁足以長人。嘉會足以合禮。利物足以和義。貞固足以幹事。非卽寬裕溫柔足以有容。齊莊中正足以有敬。發強剛毅足以有執。文理密察足以有別。以全其至聖之德乎。

乾之九三。君子終日乾乾。夕惕若。忠信所以進德也。修辭立其誠。所以居業也。知至至之。可與幾也。知終終之。可與存義也。非卽所謂自誠明。謂之性。自明誠。謂之教。誠則明矣。明則誠矣者乎。

九二見龍在田。利見大人。龍德而正中者也。庸言之行。庸行之謹。閑邪存其誠。善世而不伐。德博而化。豈非卽子臣弟友。自求未能。庸言之行。庸行之謹。有所不足。不敢不勉。有餘不敢盡。言順行。行順言。君子慥慥者乎。

乾之初九潛龍勿用。子曰。龍德而隱者也。不易乎世。不成乎名。遯世無悶。不見世而無悶。樂則行之。憂則違之。確乎其不可拔。非所謂君子依乎中庸。遯世不見知而不悔者乎。

坤之六二直方大。不習無不利。文言曰。直其正也。方其義也。君子敬以直內。義以方外。敬義立而德不孤。豈非主敬卽尊德性之事。精義集義卽道問學之事乎。致廣大而盡精微。此敬以致知。而精義之學備焉。極高明而道中庸。此敬以篤行。而集義之事全焉。溫故而知新。此專言道問學中之致知。敦厚以崇禮。此

專言道問學之篤行。豈有溫故知新爲存心之事。敦厚崇禮爲致知之事乎。
易曰。不遠復無祇悔。獨贊顏子之有不善。未嘗不知。知之未嘗復行。非卽此章
回之爲人擇乎中庸。得一善。則拳拳服膺而勿失之者乎。
火在天上大有。君子以遏惡揚善順天休命。非卽舜好問。而好察邇言。隱惡而
揚善。執其兩端。用其中於民者乎。

湯武革命順乎天而應乎人。舜文王大孝處天下之常。武王周公達孝值天下
之變。雖有性反之殊。而同合乎中庸。不失天下之顯名。則天命順焉。人心應焉。
盡美盡善矣。何得謂孔子不言湯武。至創爲武王非聖人之論乎。

仁者見之謂之仁。智者見之謂之智。百姓日用而不知。行之而不著焉。習矣而
不察焉。終身由之而不知其道者衆也。非卽此言道之不行。賢者過之。不肖者
不及。道之不明。智者過之。愚者不及。人莫不飲食。鮮能知味者乎。

咸之九四貞吉悔亡。朋從爾思。子曰。天下何思何慮。天下同歸而殊途。一致而
百慮。天下何思何慮。曰。往則月來。寒往則暑來。往者屈也。來者信也。屈信相感。

而利生焉。尺蠖之屈。以求信也。龍蛇之蛰。以存身也。精義入神。以致用也。利用安身。以崇德也。過此以往。未之或知也。窮神知化。德之盛也。非卽君子之道。費而隱。語大天下莫能載焉。語小天下莫能破焉者乎。

有天地然後有萬物。有萬物然後有男女。有男女然後有夫婦。有夫婦然後有君臣。有君臣然後有上下。有上下而後禮義有所措。豈非卽此夫婦之愚不肖。可以與知能。君子之道。造端乎夫婦。及其至也。察乎天地者乎。明夷內文明而外柔順。以蒙大難。文王以之。利艱貞。晦其明也。內難而能正其志。箕子以之。豈非卽此君子素位而行。素富貴行乎富貴。素貧賤患難夷狄。行乎貧賤患難夷狄。無入不自得。正已而不求於人。居易以俟命者乎。

觀盥而不薦。有孚顒若。觀天之神道而四時不忒。聖人以神道設教而天下服。聖人以此洗心。退藏於密。神以知來。知以藏往。聖人以此齊戒。以神明其德。夫豈非使天下之人。齊明盛服。以承祭祀。洋洋乎如在其上。如在其左右。神之格思。不可度思者乎。

易與天地準。故能彌綸天地之道。仰以觀於天文。俯以察於地理。是故知幽明之故。原始反終。故知生死之說。精氣爲物。游魂爲變。是故知鬼神之情狀。豈非卽此鬼神爲德之盛。親之不見。聽之不聞。體物而不可遺。神之格思。不可度思者乎。

大人與天地合德。與日月合明。與四時合序。與鬼神合吉凶。先天而天弗違。後天而奉天時。豈非卽此至誠之道。可以前知。國家將興。必有禎祥。國家將亡。必有妖孽。見乎蓍龜。動乎四體。善必先知之。不善必先知之。故至誠如神者乎。乾以易知。坤以簡能。易則易知。簡則易從。易知則有親。易從則有功。有親則可久。有功則可大。可久則賢人之德。可大則賢人之業。易簡而天下之理得矣。天下之理得而成位乎其中矣。又曰。天地交泰。后以裁成天地之道。輔相天地之宜。豈非至誠能盡其性。以盡人性。盡物性。則能贊天地之化育。而與天地參者乎。

天行健。君子以自強不息。地勢坤。君子以厚德載物。又曰。天下雷行物與无妄。

先王以茂對時育萬物。豈非至誠無息、不息則久、久則徵、徵則悠遠、悠遠則博厚、博厚則高明、可覆物載物成物、而自天以下、萬物覆焉、自地以上、萬物載焉者乎。

乾九三文言曰。是故居上位而不驕、在下位而不憂。故乾乾因其時而惕。雖危无咎矣。豈非卽此居上不驕、爲下不倍乎。

彖曰。大哉乾元。萬物資始。乃統天。雲行雨施。品物流行。大明終始。六位時成。時乘六龍以御天。乾道變化。各正性命。保合太和。乃利貞。首出庶物。萬國咸寧。豈非卽此致中和而天地位萬物育乎。

乾九五飛龍在天。利見大人。同聲相應。同氣相求。水流濕。火就燥。雲從龍。風從虎。聖人作而萬物覩。本乎天者親上。本乎地者親下。豈非卽此之溥博如天、淵泉如淵、見而民莫不敬、言而民莫不信、行而民莫不說、是以聲名洋溢乎中國、施及蠻貊、舟車所至、人力所通、天之所覆、地之所載、日月所照、霜露所降、凡有血氣者、莫不尊親、故曰配天者乎。

乾元者。始而亨者也。利貞者。性情也。乾始能以美利利天下。不言所利。大矣哉。大哉乾乎。剛健中正。純粹精也。時乘六龍。以御天也。雲行雨施。天下平也。非所謂惟天下至誠。爲能經綸天下之大經。立天下之大本。知天地之化育。肫肫其仁。淵淵其淵。浩浩其天者乎。

天道虧盈而益謙。地道變盈而流謙。鬼神害盈而福謙。謙尊而光。卑而不可踰。君子之終也。豈非末章衣錦尙絰。惡其文之著。君子闇然日章。小人的然日亡。淡而不厭。簡而文。溫而理。以至潛伏內省。屋漏不愧。奏格無言者。同此謙德之義乎。

謹案漢藝文志中庸說二篇。今禮記合爲一篇。此必當復舊者也。自天命之謂性以下。至次章君子中庸以下。至九經章末。雖愚必明。雖柔必強。止除首章爲子思自言道體外。餘皆述夫子之言。以告天下後世。以大本達道爲聖學體用之全。歷舉虞舜顏子子路文王之無憂。武周之達孝。使知道雖費隱而功不外乎誠明。而求誠明之道。又不外乎困勉。是爲教人希

聖之法是爲上篇。自誠明謂之性。自明誠謂之教。以下專推明夫子至聖至誠與天地參。蓋他人皆從致曲而入。自明而誠。惟聖人自誠而明。夫子有德無位。守爲下。不倍生。今不敢道古之誼。故不敢作禮樂。而制作之經。與作禮樂等。三重章末動而世爲天下道行。而世爲天下一本下有法言則。君子未有不如此而蚤有譽於天下者也。所謂蚤者。隱言萬世師表。南面之祀。雖尙未崇。而已可預卜其必可師天下。師萬世與天地同流矣。故次章卽顯言仲尼祖述憲章之事。以明溥博淵泉而時出之聲名洋溢萬國尊親之所同。後有聖人。必能知聖人也。經大經。立大本。知化育。溥博如天。淵泉如淵。浩浩其天。此皆贊歎聖人神化之詞。非告學者之詞。是故鄭氏禮記目錄曰。中庸者。孔子之孫子思作之以昭明聖祖之德。此言頗中肯綮。後人不察其爲贊聖而以爲講道。使下學望洋而歎。豈知古者立言有造道之言。有有德之言。有德之言。如聖人自說聖人事。造道之言。如賢人說聖人事。不然。但以浩淼之詞窮高極幽。使學者仰鑽瞻忽無從入。

豈聖賢教人之道乎。故末章又以閒然淡簡推本於學入德以極於不動而敬不言而信。皆由潛修開體所致。則造道之事。與上篇戒愼慎獨依乎中庸遁世不見知而不悔相應。此二篇之當分不當合者一也。哀公問政。夫子告以事親知人修身達道達德而歸於困知勉行成功則一。其告哀公已止於此。子曰好學近乎知以下。乃復囑陳九經治天下之道。則別爲一章。乃王肅家語作僞。增入哀公問曰子之言美矣至矣寡人固不足以成之也。遂復以下文子曰聯入上章。朱子不謂王肅之增竄中庸。而反謂子思之刪家語。他姑無議。試問哀公以一侯國之君。且當四分公室僅亦守府之後。而鋪陳天子敬大臣體羣臣柔遠人懷諸侯之義。何爲乎不問其關切不關切與其人之領會不領會。天下有此告君之體乎。至博學之以下。乃一篇之歸宿。下學之樞柄。王肅本反無之。蓋小人作僞。止求牽混二章爲一。並非有意於學問之事。故於其切要者反置之也。此不當合而合者二也。朱子說中庸。無大學改本補傳之失。後世讀之誠可以入德。惟

不分上下二篇。則使人不知後篇爲贊聖之詞。使人畏其高遠望洋而歎。至道問學之有知無行。分溫故爲存心。知新爲致知。而敦厚爲存心。崇禮爲致知。此皆百密一疏。恭讀

御纂性理精義。從古聖賢言學大綱。曰敬以直內。義以方外而已。內指心外指事。故書曰以義制事。義以方外之說也。以禮制心。敬以直內之說也。此丹書所謂敬勝怠者吉。義勝欲者從也。欲敗度則是無義。縱敗禮則是無敬。此丹書所謂怠勝敬者滅。欲勝義者凶也。養心則以敬爲德之興。處事則以義爲行之標。進德修業之方不外乎是。先儒變爲存養省察二義。其源蓋自中庸首章而來。持敬之純。至於雖不睹聞而戒慎恐懼。則心常存而得所養矣。故曰存養。辨義之精。至於至隱至微而必謹其獨。則事嘗有省而必致察矣。故曰省察。二者已盡爲學之方。然又必曰知行云者。知是明其理。行是踐其事。二者造道之大端也。所謂存養省察者。乃所以爲知行之本要。故非存養則此心昏亂而知無以致。此心縱弛而行無以力。是存

養者。知行之本也。非省察則不能切已體驗。而所知或不真。不能反躬克治。而所行或不實。是省察者。知行之要也。故言存養省察。則已包乎知行之事。而其義理也。該以約。言知行。則又不離乎存養省察之功。而其規模也。詳以大。存養則誠。省察則明。此由心以見之事者也。致知則明。力行則誠。此由事以歸之心者也。四者名目雖異。而功實一貫。程朱所為傳先聖之心者。以此。學者見其條件繁多。而破析以求之。則失前賢之意遠矣。理精義係官道問學為兼致知力行之事不從章句存心致知之說而以養省察之學為存心致知力行之事不從章句存心致知之說而以溫故知新為存心致知力行之事不從章句存心致知之說而以知於文義皆不合已辨明於前焉

書古微序

書古微何為而作也。所以發明西漢尚書今古文之微言大誼。而闢東漢馬鄭古文之繁空無師傳也。自伏生得尚書二十九篇於屋壁。而歐陽夏侯傳之。是為今文尚書。孔安國復得古文尚書四十五篇於孔壁。校今文多佚書十六篇。而安國從歐陽生受業。嘗以今文讀古文。又以古文考今文。司馬遷亦嘗從安

國問故。是西漢今古文本卽一家。大同小異。不過什一。初非判然二家也。自後漢杜林復稱得漆書古文尙書。傳之衛宏。賈逵爲之作訓。馬融作傳。鄭元注解。由是古文遂顯於世。判然與今文爲二。動輒詆今文。歐陽夏侯爲俗儒。今文遂爲所壓。及東晉僞古文晚出。而馬鄭亦廢。國朝諸儒知攷東晉晚出古文之僞。遂以馬鄭本爲真。孔安國本。以馬鄭說爲真。孔安國說。而不知如同馬牛。牛下本之不可相及。今略舉其不可信者數大端。後漢杜林傳。言林得漆書古文尙書一卷。常寶愛之。雖遭艱困。握持不離身。出以示宏曰。林流離兵亂。常恐斯經將絕。何期諸生復能傳之。此古文本所自出。考漆書竹簡。每簡一行。每行二十五字。或二十二字。若四十五篇之書。漆書於簡。則其竹簡必且盈車。乃謂僅止一卷。遭亂挾持不離。不足欺三尺孺子。其不可信者一。漢書儒林傳。孔氏有古文尙書。孔安國以今文讀之。因以起其家。逸書得十餘篇。藝文志敘曰。孔安國悉得壁中書。以考二十九篇。得多十六篇。而東漢諸儒亦謂佚十六篇絕無師說。夫孔安國以今文讀古文之訓。以古文考今文之本。未嘗別自成家。其

佚書之無師說。猶可言也。東漢古文力排今文之本。而自有其秦書之本。力排今文之說。而自有其師說。則必此佚十六篇者卓然皆有師說。而後可以壓倒今文。何以今文無之者。古文亦無師說乎。十六篇既無師說。則其二十九篇之師說。既不出於今文。又出自何人。豈非陰襲其齊陽改其面而又反攻其背乎。段氏玉裁甚至謂佚書增多十餘篇。孔安國皆通其說。盡得其讀。並此外壁中所出尙書。劉向別錄。桓譚新論。及藝文志所謂五十八篇者。孔安國亦盡得其讀。則是安國佚書較伏生更多三十篇。不止十六。何以史遷問故不傳一字。而衛賈馬鄭傳古文者。卽十六篇亦不傳一字乎。矢口猖言。不顧其後。其不可信者二。漢書儒林傳。言史遷嘗從安國問故。而遷書所載堯典皋陶謨禹貢洪範。微子金縢多古文說。則史遷爲安國真古文之傳。皎如天日。今馬鄭堯典皋陶謨微子金縢無逸諸篇。無一說不與史遷相反。以堯典璇璣玉衡之天象。而改爲漢世浴下閔之銅儀。以微子篇之太師疵少師彘。而誣爲箕比。以無逸篇淫亂之祖甲。誣爲賢君。列於三宗。周公攝政十年。不並居喪居東數之。以爲居東

三年而後迎歸。歸而後叛。叛而後東征。東征歸而後居攝七年。首尾十二年之久。南轅北轍。誣聖師心。背理害道。不可勝數。豈史遷所傳安國之古文。反不如杜林衛宏杜橫之古文乎。後儒動以史遷之異馬鄭者。擠之爲今文學。豈孔安國亦今文非古文乎。西漢之古文與今文同。東漢之古文與今文異。上無師傳。且皆反背師傳。其不可信者三。西漢今古文皆出伏生。凡伏生大傳所言者。歐陽必同之。大小夏侯必同之。史遷所載孔安國說必同之。猶詩齊魯韓三家實同一家。此漢儒師說家法所最重。若東漢古文則不然。馬融不同於賈逵。賈逵不同於劉歆。鄭元又不同於馬融。一稽古而馬以爲順考古道。鄭以爲同天。一七政而馬以爲斗七星分主日月五星。鄭以爲天地人四時。一六宗而劉歆以爲乾坤六子。賈逵馬融以爲日宗月宗星宗河宗海宗岱宗。鄭以爲星辰司中司命一本命下有兩師。一五器也。馬以爲卽五玉。鄭以爲卽五贄。一舜咨二十二人也。馬取六官十二牧。進四岳而去四佐。鄭以爲九官十二牧。兼四佐而去四岳。一舜登庸在位之年也。鄭作二十年百歲。馬作三十年增百有十二歲。試

問何爲古文。鄭師馬而異於馬。馬師衛賈而酒誥成王若曰異於衛賈。馬衛杜古文。應本劉歆。而六宗異於劉歆。孰真古文。孰非古文乎。且鄭注大學。康誥帝典之克明德。與尙書典誥之克明。一本明下德。判然不同。堯典之稽古。與皋陶謨之稽古不同。則鄭亦自異於鄭。孰古文。孰不古文乎。有師傳家法乎。無師傳家法乎。鄉壁虛造。隨凡師心。不知傳受於何人。其不可信者四。儒林傳述古文尙書。孔安國授都尉朝。朝授膠東庸生。庸生授清河胡常。常授虢徐敖。敖授琅瑯王璜。平中平陵塗惲子真。子真授河南桑欽君長。是安國之傳授與杜林循宏迥不相承。不知杜林所得之本。卽安國壁中之本乎。抑別自一本乎。伏生得自複壁。孔安國得自共王廢宅。河內女子得自老屋。何以杜林本不言得自何所。其師說亦不言授自何人。其不可信者五。近世治尙書者。江聲王鳴盛多祖馬鄭。孫星衍持平於西漢今古文。而段玉裁則凡史遷本之異於馬鄭者。皆擠爲今文說。專以東漢鄉壁虛造之古文爲真古文。且謂今文之說皆不如古文。而伏生歐陽夏侯孔安國之微言大義。幾息滅於天下。予尋繹有年。深悉東

漢杜林馬鄭之古文依託無稽。實先東晉梅傳而作偽。不惟背伏生背孔安國。而又鄭背馬馬背賈。無一師傳之可信。正猶易古文出自費直。費直易無章句。但以象象文言繫詞解易。而鄭傳費氏易。則臆創爲者。支離穿鑿。但借一先生之名以自蓋其欺。一本而鄭傳費氏易則臆創爲者支離穿鑿但借一先生之名以自蓋其欺名以自蓋其欺作而有成鄭則卦氣消息委展各自創樹不知何其義理凡繫君德者。必推而屬之外事。故注大學康誥堯典之明德。則皆以爲自明其明德。及改注尙書。則又指明用才俊之人。洪範沉潛剛克。不言其德性之互濟。而謂專攻其陰潛之人。以防亂臣賊子。違經害義。弊等申韓。君奭篇則以召公不說周公謂其復辟。以後卽當去位。不當專位固寵。周公亦自白言我不以後人迷不爲子孫計。皆以世俗之腹度聖賢之心。視西漢今文家誼。不可同年而語。予既成詩古微二十二卷。復致力於尙書。墜緒茫茫。旁搜遠紹。其得於經者凡四大端。一曰補亡。謂補舜典而並補湯誥。又補泰誓三篇武成二篇牧誓一篇。以及度邑作雉爲周誥之佚篇。二曰正譌。如正典謨稽古爲通三統。正放勳重華文命爲有天下之號而非名。正母若丹朱敖爲帝舜戒禹教。

子之訓。而非禹以丹朱戒舜。正殷高宗形日爲盾嗣而非爲祭禰。正無逸三宗謂太甲太宗中宗武丁高宗。而無淫亂之祖甲。微子所問爲大師疵少師攷。而非父師箕子少師比干。金縢鴟鴞爲陳善責難。而非疑忌。梓材爲魯誥而非康誥。三曰稽地。如考禹河而知有千年不決之漬。稽江漢而知下游有三江分流入海之口。上游有江在荊州夷陵有分作九江之事。中游至尋陽九派不謂九江。且彭蠡在江北不在江南。而漢爲北江之案定。又知雍州黑弱合流潛入青海。自合黎視之謂之南海。自雍州望之謂之西海。以其色青黑謂之青海。地里志西海有黑水祠有西王母石室。此黑水入南海之明證。青海至今不通舟楫。不勝鴻毛。中有二島。惟冰合可渡。番僧裝一歲糧入定其中。此青海卽弱水之明證。四曰象天。知維斗爲黃道極。旋繞乎赤道之北極。周建乎四時。終古無歲差。故可爲外璇璣。亦可爲大玉衡。而非北斗之玉衡。卽北斗之三建。亦皆指北方以正子位。以佐璇璣之用。而並非建子建丑建寅之建。於是天文地理。皆定位於高高下下之中。孔思周情。各呈露於噩噩渾渾之際。天其復明斯道於世。

盡黜僞古文十六篇。並盡黜馬鄭之說。而頒西漢古誼於學宮矣乎。抑猶不可復明矣乎。先王先聖之靈。尙其鑒之。咸豐五年正月。敘於高郵州。

舜典補亡篇。當增堯曰。咨爾舜。允執其中。天之歷數在爾躬。四海困窮。天祿永終。及舜讓于德。弗嗣。及受終于文祖。

書古微例言上。

東晉晚出之孔安國古文尙書。僞經僞傳僞序。三者並發端於朱子語錄中。嘗疑孔書所增大禹謨仲虺之誥。咸有一德。伊訓太甲說命。泰誓武成。君陳。周官畢命等十六篇。皆伏生所無。不應伏生老年所記。皆其難者。而易者反不記。且西漢以前。經與傳皆別行。至馬融始以注附經。豈得西漢已有附經之傳。其孔序庸沓不似西漢文。蒼古之體。甚屬可疑。言之鑿鑿。乃其徒蔡沈奉命作傳。不知引申師說以判正僞。遂仍舊轍。貽誤後學。惟宋末吳氏澄著書經纂言。專註今文。而古文則但云嗣出。蓋托詞以幹旋功令也。明人梅鷟始力攻古文。而義多武斷。考證尙疏。人多不信。其昌言排擊盡發癥結者。則始於 本朝閻若璩。

之古文尙書疏證。閩書已收入四庫全書。而惠棟江聲孫星衍王鳴盛段玉裁亦皆有疏證。惟孫氏知伏生今文書大傳說之勝於馬鄭古文。予則更廓其疇。窮其闕奧。以盡發馬鄭之覆。而闡西漢伏孔歐陽夏侯之幽。使絕學復大光於世。夫毛傳尙可與三家詩並存。若偽古文之孔造經傳。上誣三代。下欺千載。今既罪惡貫盈。閱實詞服。卽當黜之學校。不許以偽經出題考試。不許文章稱引。且燬偽孔傳。偽孔疏及蔡沈集傳。別頒新傳新疏。而後不至於惑世誣民。至馬鄭傳注之故。背今文孔造古文說者。亦不足以相代。則欲立學宮舍西漢今文家專門之學。其將誰歸。夫黜東晉梅賾之偽。以返於馬鄭古文本。此齊一變至魯也。知并辨馬鄭古文。說之孔造無師授。以返於伏生歐陽夏侯及馬遷孔安國問故之學。此魯一變至道也。自非我國家經學昌明。轍唐凌宋。何以有是。爰附書其端末于目錄後。以告承學治古今文之士。

書古微例言中。

嘗訝伏生口授今文尙書。傳自七十子。微言大誼。炳若日星。歐陽大小夏侯祖

述之。各不離其宗。西漢上自人主。下自公卿。無不以今文博士爲師者。故漢書言自歐陽生傳伏書。至歆八世。皆爲博士。他儒之傳歐陽書者。亦往往入傅太子。如桓榮以稽古之學。勸其徒。疏廣疏受以黃金之賜。娛老鄉里。門人弟子會葬輒數千人。經學之盛。未有過此者。何以一至東漢。教輒旁歧。劉杜衛賈馬不足道。鄭康成以親注大傳之人。其服膺伏生。不爲不至。何以一旦改歸賸本。自甘矛盾而不顧。且令天下靡然從之。不及百年。今文書及齊魯詩並歸亡佚。惟韓詩序二卷。歷唐及北宋。而亦亡於南渡。何哉。及讀藝文志曰。古之學者。耕且養。三年而通一經。故用力少而畜德多。三十而五經立也。後世經傳既已乖離。說者不思多聞闕疑之誼。而務碎逃難。便辭巧說。破壞形體。說堯典二字之文。至十餘萬言。說若稽古三萬餘言。後進溺以馳逐。故幼童守一藝。白首而後能言。安其所習。毀所不見。此學者大患也。而後知今文之敝。非盡東漢古文家敝之。乃今文家先自敝也。夫堯典若稽古有何奧難。而漫衍至是三萬言十萬言之多。蓋猶後世之制藝講章也。宋儒表章四子書教士。望其學聖有途轍。不歧

於異端俗學。豈知功令既頒之後。至明而蒙引存疑。淺說達說。說約之講章。鄉會之程墨。鄉社之房稿。定待闢在之選本。皆至於汗牛充棟而不可極。其敝於利祿。亦何異漢士說堯典稽古者乎。故以馬融之貪肆。而公詆歐陽生爲俗儒。猶今之淹博詞章者。詆業科舉之士爲俗儒也。以彼今文家皆利祿之徒。而古文家爲高材博學之徒矣。夫歐陽夏侯不敝。而諸生習其支葉。甘爲利祿者敝之。馬鄭斥利祿之輩。謂俗儒可也。並斥歐陽大小夏侯之師。授淵源於七十子者。亦爲俗儒可乎。並畔伏生大傳而不問。而凡造矯誣。使微言大誼盡變爲膚淺可乎。斯則又東漢馬鄭古文家之失也。卽僞孔傳亦乘馬鄭支離臆說之極弊而乘虛以入者。使今古文兩敗俱傷。誰之咎歟。烏乎。古學之廢興。關乎世教之隆替。主持師道者。固不可有毫髮之弊。苟忘其本教。而稗販聖經以博衣食。未有不累及先師者。可勝歎哉。故因論今文古文而慨喟再三也。

書古微例言下。

西漢今古文既阨於東漢馬鄭之訛說矣。至今存什一於千百。而微言大誼綿

綿延延。竟能回千鈞於一髮。使古誼復還者。何哉。則全賴有史記漢書及伏生大傳殘本汲冢周書佚本三者爲之命脈也。璣衡之說。史記與大傳符。淮南天文訓周髀算經與史記符。故銅儀玉管機巧之說。終西漢世不能惑。荊州九江卽九穴。在巴陵西。不在巴陵南。有班志所引桑欽古文說可憑。揚州九江。有太史登廬山觀尋陽九江可憑。其自荆至揚江漢分流。有鸛鵲洲及尋陽桑落洲。分九派可憑。江行各洲之南。漢行各洲之北。始知彭蠡之在江北而不在江南。爲今太湖望江等縣之諸湖蕩。以至皖江上游爲漢水之大螺旋。故有彭蠡之名。又音轉爲大雷池之名。及其三江歸宿。則又有漢志毗陵北江入海揚州川。丹陽中江入海揚州川之語。至黑水。則地里志西海有黑水祠。西海卽青海。自雍州東望之爲西海。自合黎言之爲南海。自黑水言之爲青海。今乃並知此水不勝鴻毛不通舟楫。中有二島。惟冬日冰合番僧裹一歲糧入定其中。是知天然弱水。弱黑並爲一川。皆潯源重發於此。潯而不流。此皆漢書地理志西海黑水祠之力也。況地理於他山水亦皆於其下注明。禹貢作某古文以爲某。與桑

欽禹貢山水澤地相符。其有功經義甚大。不然。盡以後世之江漢爲禹貢之江漢。如蘇氏蔡氏胡氏之一江三名者。以黑水爲滇黔之水者。其錯繆尙可問乎。至北條之水。則史記河渠書禹鑿二渠。一爲冀州高地之河。一爲深川入濟之河。後世冀州九河盡沒。而深川千乘之河。自東漢至唐宋五代千年無患。非史記何由知爲禹迹乎。此又史記河渠書之力也。惟天文與輿地皆必須圖。而璇璣之不用北斗而用維斗。其玉衡北斗又止用其建北方而定子位。故初昏夜半平旦杓魁衡三建。而皆非建寅建丑建卯之建。且建有所窮。則濟之以中星。中有所窮。則助之以斗建。此自來闢天文者所未有。鄒君漢助曾爲余代繪唐虞天象總圖。次璇璣內外之圖。次玉衡三建皆建。北方定子位分平旦夜半初昏及中星用事分繪各圖。於金陵付梓。而江陵告變。圖板皆燬於兵燹。鄒君又殉節於廬州。有天喪斯文之痛。謹泫然記之。

詩古微序

初編

詩古微凡二十有二卷。上編六卷。并卷首一卷。通語全經大誼。中編十卷。答問

逐章疑難。下編五卷。其一輯古序。其二演外傳。詩古微何以名。曰。所以發揮齊魯韓三家詩之微言大誼。補苴其罅漏。張皇其幽渺。以豁除毛詩美刺正變之滯例。而揭周公孔子制禮正樂之用心於來世也。蓋自四始之例明。而后周公制禮作樂之情得。明乎禮樂而后可以讀雅頌。自述熄詩亡之誼明。而后夫子春秋繼詩之誼章。明乎春秋而后可以讀國風。正變之例不破。則雅頌之得所不著。而禮樂爲無用也。美刺之例不破。則國風之無邪不章。而春秋可不作也。禮樂者治平防亂。自質而之文。春秋者撥亂返治。由文而返質。故詩之道。必上明乎禮樂。下明乎春秋。而後古聖憂患天下來世之心不絕於天下。學問之道。不愆不敗。不悱不發。不以一隅反三隅。則不復。余初治詩。於齊魯韓毛之說。初無所資主。顧入之既久。礙於此者通於彼。勢不得不趨於三家。始於礙者卒於通。三家實則一家。積久豁然。全經一貫。朋亡蒨祛。若牖若告。憤悱啟發之功也。舉一反三之功也。學問之道。固不可淺遇而可深逢者也。雖然。詩教止於斯而已乎。韓詩外傳言昔者子夏彈琴以詠先王之風。有人亦樂之。無人亦樂之。至

於發憤忘食。然夫子猶造然變容曰。子已見其表。未見其裏。闢其門。不入於中。安知其奧藏之所在乎。邱嘗冥心以入其中。前有高岸。後有深谷。填填正立而已。此所謂深微者也。深微者何。無聲之禮樂。志氣塞乎天地。此所謂興觀羣怨可以起之詩。而非徒章句之詩也。故夫溯流頽則涵泳少矣。鼓絃急則適志微矣。詩之道可盡於是乎。烏呼。以俟假年。以待來哲。

董子春秋發微序

董子春秋發微七卷。何爲而作也。曰。所以發揮公羊之微言大誼。而補胡毋生條例何邵公解詁所未備也。漢書儒林傳言董生與胡毋生同業治春秋。而何氏注但依胡毋生條例。於董生無一言及。近日曲阜孔氏武進劉氏皆公羊專家。亦止爲何氏拾遺補缺。而董生之書未之詳焉。若謂董生疏通大誼。不列經文。不足頡頏何氏。則其書三科九旨燦然大備。且宏通精微。內聖而外王。蟠天而際地。遠在胡毋生何邵公章句之上。蓋彼猶泥文。此優柔而鑒飫矣。彼專析例。此則曲暢而旁通矣。故挾經之心。執聖之權。冒天下之道者。莫如董生。今以

本書爲主。而以劉氏釋例之通論大義。近乎董生附諸後。爲公羊春秋別開闢域。以爲後之君子。亦將有樂於斯。至繁露者。首篇之名。以其兼撮三科九旨。爲全書之冠冕。故以繁露名首篇。後人妄以繁露爲全書之名。復妄移楚莊王一章於全篇之首。矯誣之甚。故今仍以繁露名首篇。其全書但稱曰董子春秋。以還其舊。至其三代改制質文一篇。上下古今。貫五德五行於三統。可謂窮天人之絕學。視胡毋生條例有大巫小巫之歎。況何休之偏執。至以叔術妻嫂爲應變。且自謂非常可憲之論。玷經害教。貽百世口舌者乎。今分七卷。臚列其目於前。以詔來學。

繁露第一

張三世例通三統例異內外例

愈序第二

張三世例

奉本第三

張三世例

三代改制質文第四

通三統

例

爵國第五

通三統例

符瑞第六

通三統例

仁義第七

異內外例

附公始終例

王道第八

論正本謹微兼譏貶例

順命弟

九 爵氏字例

爵名

觀德第十

爵氏字例

爵名

玉杯第十一

予

奪輕重例

玉英第十二

予奪輕重例

精華第十三

予奪輕重例

竹林弟十四

兵事例

國取邑表入

滅國弟十五

邦交例

明表

隨本消息弟十六

邦交例

同上

度制弟十七

禮制例

明表

郊

義弟十八

禮制例

明表

二端弟十九

災異例

天地陰陽弟二十

災異例

五行相勝弟二十一

災異例

陽尊陰卑弟二十二

論陰陽

會要弟二十三

通論春秋

正貫弟二十四

通論春秋

十指弟二十五

通論春秋

小學古經敘

小學大學同表章於朱子。而有皆不可解者焉。大學既不悟古本之條貫。故格致知本之義不明。而外求物理之疑始啟。夫執古本以改改本者。順而易。執改本以爭古本者。逆而難。此大學所以久成諍蔽也。至小學之書。則朱子序大學。即謂曲禮少儀內則弟子職諸篇。皆小學之支流餘裔。及晚年編儀禮經傳通解。立學禮一門。亦取保傅學記曲禮少儀容經弟子職諸篇為正經。是朱子所述小學古經數篇。至為明著。上合先王造士國學十五歲以前蒙養始基之誼。

不知何以劉子澄奉命集小學。分散身稽古明倫三類。而三類之中。皆無正經。三類之外。益以嘉言善行。無非割裂經傳。雜錄方言俚語。燕冗至不可讀。雖元代許魯齋以教蒙古子弟。極力表章。而當時處道園諸公。卽已議其陋而不尊。又首以天命之謂性。率性之謂道。修道之謂教爲言。於小學何與。誠教學之遺憾也。今本朱子大學序及學禮門以成是編。立教則以保傅學記二篇爲正。而荀子勸學附之。敬身則以曲禮容經爲正。而踐阼記附之。明倫則以內則少儀弟子職爲主。而略損益之。由是每門之中。各有三篇正經。以存先王立教之遺。而其體尊矣。雖勸學篇兼及大學。踐阼篇非訓蒙儲。然敬義徹上徹下。且大戴不列於經。可藉是以存格言。荀子語無深微。初學尤資策厲。遠在劉子澄集本語錄俚語之上。於朱子平日序大學編學禮之意。粲然合符。循而行之。可由灑掃應對得精義之漸。裕作聖之基。其功於大學非淺也。至漢志以六書爲小學家。而朱子儀禮經傳通解。學禮亦列書數一篇。卽保傅所謂學小藝履小節之事。但令初識形聲。稍知乘除。以便日用而已。豈能真以勾象之舞。並鐘律。灋掃。

之禮盡軍賓戢。而近儒遂欲以小學蔽先王造士之法。以六書蔽小學養正之功。形聲詁訓。童而究之。白首莫殫。終身無入大學之期。則又固之甚者也。孩提知愛。稍長知敬。赤子之心。大人之性。山下出泉。性清而靜。是謂聖功。蒙以養正。是謂教本。爲山九仞。畚爾小子。尙其敬聽。道光二十九年七月。邵陽魏源序於揚州絮園。

大學古本敘

大學之要。知本而已。知本之要。致知誠意而已。至善無惡。人之性。可善可惡。人之心。爲善去惡者。誠意。擇善明善者。致知。以中庸證大學。先後同揆。若合符節。故致知誠意二章。皆以此謂知本結之。此千聖之心傳。六經之綱領也。物有本末。脩身以上爲本。齊家以下爲末。格物者。格其意心身家國天下之物。以知其誠正脩齊治平之理。朱子或問文集語錄屢言及之。本末不偏。惟未悟古本分章之條理。而誤分經傳。加以移補。遂留後人之疑。以爲不格心意身之物。而泛言卽凡天下之物。明代王文成公始復古本。而又未悟格物之本誼。遂謂無善

無惡心之體。有善有惡意之動。知善知惡者良知。爲善去惡者格物。與中庸明善先於誠身。擇善先於固執之旨。判然相歧。於是使誠意一關。竟無爲善去惡之功。而以擇善明善屏諸大學之外。又以無善無惡之體破至善之天則。變聖經爲異學。而其徒王幾。遂並以正心爲先天之學。誠意爲後天之學。明季高忠憲顧涇陽力排之不遺餘力。今雖熄訟。而補傳未去。錯簡未復。則大學之誼不章。便朱子閤合古本之旨意。而並顯符古本之章次。則不致文成之疑。雖道問學而不失於支。使文成顯復古本之章次。而並閤符格致之條理。則不至啟末流之弊。雖尊德性而不流於蕩。豈非千載遺憾有待後人者乎。源紬繹有年。渙然於古本致知章誠意章居首之誼。天造地設。證以中庸明善誠身。及宋明諸儒之說。而二章不分經傳之案定矣。再以正脩章爲敬以直內之功。存養與知行並進。而敬補小學之說。亦不必外求矣。明代高忠憲公。及國朝李文貞公。並力主古本之義。卽宋儒陸子言格物。亦與朱子無殊。但俱未有成書。則古本義終未著。爰恭錄

欽定禮記義疏案語於首。其經文共分致知章誠意章

正脩章脩齊章治章平章。凡六章。一循古本之舊。不分經傳。盡錄朱子章句原文於下。卽以今本之說注古本之書。天造地設。不約同符。又自以己意。每章別加闡擇。取明大意而止。其下編復取宋明儒先之說。旁推曲暢。以盡其義。凡得書二卷。倘得如康熙中纂修周易折衷大學士李光地奏復朱子古本之例。使大學亦以古本頒學宮。以復石經孔曾千年之舊。是所望於主持功令者。道光元年歲在辛巳。書於京師。

孝經集傳序

以孝經次大學之後何也。大學出於曾子。而孝經則夫子所特授曾子之書。當世卽尊爲經。魏孝文侯已爲之傳。公羊緯所謂夫子自言志在春秋。行在孝經。眞垂世立教之大原。蓋孝經言不敢者七。至春秋而皆敢之矣。敢心生於不敬。敬者孝之主宰也。故總不惡不慢於不敢之中。敬則無不愛也。其微言大義。則備於禮記。後人或淺近視之。於孝經之中。又裂分經傳。加以刪削。與大學補傳改本同失。而孝經之誼幾亡。惟明漳浦黃子集傳。以大小戴記爲孝經義疏。精

微博大。賄括宏深。實爲孝經之素臣。爲從來注孝經者所未及。源嚮往服膺。一詞莫贅。乃節錄其傳。列於大學古本之後。使曾子之學大明於世。抑又考古今言孝者。推舜爲大孝。武王周公爲達孝。曾子爲至孝。然曾子得曾皙以爲之父。春風沂水舞雩詠歸。同爲聖人之徒。各由狂狷以造於中行。其天倫所遇之境。蓋過於舜。而幾同於達孝之周公。孝經嚴父配天之誼。惟夫子以章布宮王祀。上及先世。足以當之。而曾子亦其鄰幾者也。孝經之傳。專授曾子。意深矣哉。有出乎立身行道揚名後世外者矣。故特推禮記中仁人孝子事天如事親。事親如事天。惟仁人能言帝。惟孝子能言親之旨。揭諸篇端。而朱子孝經刊誤疑之。謂言孝自有親切處。何必言嚴父配天。爲將恐啟人間奸之心。試思張橫渠西銘父乾母坤。以大君爲宗子。惡旨酒崇伯子之順養。育英才穎封人之錫類。不弛勞而底豫。舜其功也。無所逃而待烹。申生其恭也。體其受而歸。全省參乎。勇於從而順命者。伯奇也。與孝經嚴父配天之義有何區別。自宋儒言之。則發前聖所未發。自周儒言之。則恐啟間奸之心。斯誠所不解也。道光元年。叙於京師。

曾子章句序

以曾子十篇並孝經次大學之後何也。此亦曾子門人記曾子之書。宜與孔子之論語、孟子之七篇、子思之中庸並列於四子書者也。漢藝文志曾子十八篇。隋唐志及北宋御覽皆有之。迄南宋而亡。今惟存大戴禮者十篇。各冠以曾子。固洙泗大誼微言。武城畢生踐履。皆於是乎在。凡孟子彼富我仁。彼爵我義之文。董仲舒尊聞行知。高明光大之義。皆見其中。而小戴祭義。則全取大孝篇文。子思子樂正子門人述之。齊魯秦漢儒者罔不誦法稱道之。聖大學小學樞要。宜旦夕奉師保臨父母者也。奈何小戴去取不倫。而鄭康成又不註大戴禮。遂以此不列於經。又不獲與大學孝經並表章於宋儒之手。惟宋楊氏簡明、劉氏宗周、皆篤學大儒。始各注十篇以貽世焉。曾子得聖道宗。孝盡性。誠立孝。敬存誠。萬倫萬理。一反躬自省。出之初罔一言。內乎深微。外乎閑侈。惟爲己爲人。義利際。諄諄提撕而辟呬之。百世下如見其心焉。暨天圓篇原聖人制禮作樂之由。以明人性之最貴。日用則神化也。庸德則大經也。不越戶庭。明天察地。體用

費隱貫於一。不遺不禦也。或謂曾子十篇。多言功夫。罕言本體。不及子思孟子之精微。試觀本孝篇。夫孝置之而塞乎天地。博之而橫乎四海。施諸後世而無朝夕。推而放之東海而準。推而放之西海而準。推而放之南海而準。推而放之北海而準。仁者仁此者也。義者宜此者也。禮者體此者也。忠者中此者也。信者信此者也。行者行此者也。強者彊此者也。樂自順此生。刑自反此作。此外尙有何本體。何功夫之不該乎。南宋朱子跋汪暉所輯曾子。雖極推曾子之學主躬行。聞一貫。而終身所守不離孝敬清讓之規。專以輕富貴守貧賤不求人知爲大。是以從之游者。所記雖或淺近。而必有益於日用躬行之實云云。豈必欲其如中庸之經大經。立大本。知化育。肫肫其仁。淵淵其淵。浩浩其天。然後爲高深乎。然江漢以濯之。秋陽以暴之。曾子之知聖人。其道光輝。皜不可尙。卽中庸淵淵浩浩所自出。其見道也。徹上徹下。一以貫之。宜乎子思孟子皆出其門矣。至德以爲道本。顏閔仲弓曾點之徒以之。敏德以爲行本。孝德以知逆惡。曾子以之。聖門澠掃應對。可以精義入神。況洞洞屬屬執玉奉盈者乎。烏乎。曾子之以

書傳。非曾子意也。其意蓋將以夏道之忠。採周文之敝。所謂依乎中庸。遜世不見知而不悔者也。宜乎後世不深知而淺近視之也。十篇之外。曾子言行他見者。彙輯數篇於後。子思亦曾子門人。故類附焉。烏庠十篇之不列於四書。乃儒林憾事。而欲以區區之力。表章其間。智小任重。言僭行竄。是以戰戰兢兢若履薄冰云爾。道光元年。敘於京師。

曾子章句序

案此篇見湖南文徵及紹世文編與前篇互有異同因並存之

夫子歿。斯文未墜于地。則惟曾氏以至誠紹其宗。授子思孟子爲萬世極。漢藝文志。曾子十八篇。隋唐志及北宋御覽咸有之。迄南宋而亡。今惟存大戴禮者十篇。各冠以曾子。與小戴曾子問皆夫子語者固殊。蓋洙泗大義微言。武城畢生踐履。於是在。凡孟子彼富我仁彼爵我義之文。董仲舒尊聞行知高明光大之義。皆見其中。而小戴祭義。則全取大孝篇文。專父母篇。坐尸立齋之云。則小戴刪取大戴明證也。子思樂正子門人述之。齊魯秦漢儒者。罔不誦法稱道之。聖小學大學樞要。宜旦夕奉師保臨父母者也。奈何小戴去取不倫。而鄭康成

氏。又不注大戴禮。既以此不列于經。又不獲與大學中庸同表章。後世徒相沿。緯書行在孝經語。以爲眞夫子授曾氏書。曾氏書順若明若。滅斷簡中。千載莫過問焉。曾子得聖道宗。孝盡性誠立。孝敬存誠。萬倫萬理。一反躬自省。出之初。罔一言內乎深微。外乎閎侈。惟爲己爲人。進退義利。際諄諄提撕而辟呬之。百世下如見其心焉。暨天圓篇。原聖人制禮作樂之由。以明人性之最貴。日用則神化也。庸德則大經也。不越戶庭。明天察地。體用費隱。貫於一不遺不禦也。少習孤經。懿好攸在。茫茫絕緒。問津不聞。譌而互諸。塞而濫諸。微言未窺。大義誰揭。不揣狂簡。綱之紀之。仰鑽既竭。告語如聞。而其軼時時見他說者。亦網羅而部彙之。爲五篇於其後。嗚呼。曾氏之以書傳。非曾氏意也。曾子固以身教而不以言教者也。其志蓋將以夏道之忠。挾周文之敝也。姬公制作之精意。溍然以清泐然。以肫者。唯曾氏爲得之。儒行缺。世教漓。視人生之初。幾若茹毛飲血之不可復見于世。嘗試與之陳尼輝之遺文。稽龜麟之舊冊。則亦歷歷然若臚誦之熟諸口也。臬比之習于耳也。忽忽乎若來若去之無戚于懷也。逃空容者聞

足音而起。厭稻梁者易以黍稷而或樂。則茲編之晚顯于世也。其亦將天之有意于世乎。其亦末學之有幸於迷途乎。智小任重。言僭行竄。是以戰戰兢兢。若履薄冰云爾。

子思子章句序

中庸之爲子思子。尙已。而坊表緇衣與焉。有徵乎。曰有。隋書音樂志載沈約之言曰。禮記月令取呂氏春秋。緇衣中庸坊記表記取子思子。樂記取公孫尼子。一也。御覽引子思子曰。天下有道。則行有枝葉。天下無道。則言有枝葉。今見表記。二也。文選注引子思子曰。昔吾有先正。其言明且清。國家以寧。都邑以成。今見緇衣。三也。且坊表言必稱子。而引論語之文。間一。又數引春秋。間二。且獨稱子云。子言之。與他書記聖言體例不倫。問三。三徵既明。三間俱釋。於是敍曰。聖人憂患天下來世其至矣。刪詩書。正禮樂。皆述而不作。有大義。無微言。豈預知有論語。爲後世入道門哉。假年絕章來。天人性命之理。進修聚辨之方。无咎寡過之要。胥於易乎在。子思本祖訓發揮之。故中庸一易道也。表記言正而合道。

見稱伊川程氏。則論語輔也。易之誠論語之仁。皆古聖未發。而夫子發之不讀。中庸不知誠爲盡性之要。不謂表記不知敬爲求仁之方。而望易論語精微。猶入室不由戶也。坊緇之文。其閔深誠與庸表有間。然禮坊德。刑坊淫。命坊欲。綱萬事於三端。聖人既以敘彝倫。建皇極。而緇衣數理化得失。爲百世君民臣主師。尼門五尺所言。要非霸世所得聞者。蓋易論語明成德歸。詩書禮春秋備經世法。故坊記以春秋律禮。緇衣以詩書明治。體用顯微。同源共貫。于道之大而能博者。其亦具體而微矣。世人惟知史記子思作中庸。故著蔡之。而此三篇之爲弟子述所聞者。則自唐後二十篇書原不存。亦遂如演迷濟海淪碣矣。予悼斯道之湮微。乃別而出之。各爲紬繹。而中庸則專以易道發之。用補苴先哲。其軼言時時見他說者。亦輯成篇。而後祖孔師曾迪孟之學大略明。且備剛矣。誠矣。高矣。明矣。宋汪暉編子思子。妄攔孔鮒贗書。而顯昧四篇之正經。棄天球寶康瓠。傾莫甚焉。今遂擴勿道也。

董仲舒春秋繁露引坊記君子不德利以道民一章稱爲孔子之言蓋子思之刪本多亂述如道德齊禮與夫南人有恒之章皆錯見于諸篇不啻其全篇之

荀子思也。禮記鄒目錄于坊表緇衣三篇不言出于思者。劉向稱緇衣公孫尼子作者。案漢志公孫尼子七十子之弟子。或共嘗受業于思。故辭述師說。以成所傳。歟。然則坊緇衣文未能闕。深亦記不一手。故也有以此三事獻疑者。因各爲條之。如此。

論語孟子類編序

序曰。經有奧義。有大義。研奧者必以傳注分究而始精。玩大者止以經文彙觀而自足。諸子書無不各從其類。故漢儒林傳言費直易無章句。惟以彖象文言傳詞解易。而漢書儒林敘亦曰。古之學者耕且養。三年而通一經。存其大體。玩經文而已。況論語孟子顯白之文。至今如侍辟珥而聞詔告。非典謨盤誥聲牙。疆詰之比。奚必待傳注而後明哉。自明以來。學者爭朱陸。自本朝以來。學者爭漢宋。今不令學朱學陸。而但令學孔孟焉。夫何諍。然近日治漢學者。專務記醜。屏斥躬行。卽論洙泗淵源。亦止云定哀間儒者之學如是。在子思孟子以前。其意欲託尊論語以排思孟。甚至訓一貫爲壹行。以詁經爲生安之學。而以踐履爲因勉之學。今卽以孔孟曾思之書條貫示之。其肯相從於鄒魯否。尙未可知也。夫聖人之道。大而能博。賢人學之。各得其性所近。故聖人之言。必引而就卑。

不如此則人不親。賢人之言。或亢而自高。不如此則道不尊。且教法因人因時。原無定適。孔子動教求仁。而孟子則獨標集義。仁之氣渾然。義之氣浩然。其得之天授。已不盡同。孔子教人專主博文約禮。而仁在其中。故不言心而心自存。此合德性問學爲一者也。孟子直指人心。體驗擴充存養。孔子動言禮樂造就成德。孟子則不但無一言及樂。亦從無琴瑟弦歌之事。陶融禮樂之化。卽博學詳說之語。七篇中亦僅一偶及焉。不必下學而自能上達。且孔子并學夏殷周之禮。孟子則諸侯之禮未學。周室頒爵祿不知其詳。此尊德性多於道問學者也。然聖人言近而指遠。雖不示中人以上。而天何言哉之訓。無行不與之訓。知我其天之訓。則直以天自處。且歎道體於逝川晝夜。悟性天於朝聞夕死。徹上徹下。精義入神。故曰子罕言利與命與仁。蓋元亨利貞。性與天道。皆寄於假年學易。得聞者惟顏子一人。故易繫以顏子與箕文同列。豈僅詩書執禮之雅言所能盡者乎。孟子一生惟以上繼春秋自任。旁引詩書。而無一言及於易。亦無一言及於天道。此其精微之同異。蓋孔子自誠明。而孟子自明誠者也。孔子天

下至誠。而曾子孟子。皆其次致曲。曲能有誠者也。曾子以魯得之。子思孟子皆以高明得之。然則後世學聖人者。宜如之何。曰。自以學孟子爲易簡直捷而適於用。學曾子爲篤實嚴密而切於體。於聖門爲好仁惡不仁之分。雖萬世無弊可也。然聖門中四科七十子。狂簡斐然。極一時之盛。孟子則一生所造就。僅樂正子一人。此外公孫丑萬章咸邱蒙之徒。以問答相接。無一言及於身心砥礪之事。且其所問如舜臣堯叟及舜父殺人竊負逃海。皆五尺童子所不願聞。問其所不必問。答其所不必答。直當在不屑教誨之列。不知後車十乘從者數百人。終日追隨所爲何事。豈其學專宜中人以上歟。遂使後世有軻死不得其傳之嘆。正猶陸王之學。皆不再傳而決裂。遠不及程朱源流之久遠。又何說也。謹質所疑。俟知德君子折衷焉。

孟子小記。

咸邱蒙問曰。舜南面而立。堯帥諸侯北面而朝之。瞽叟亦北面而朝之。舜見瞽叟。其容有蹙。是以舜見堯之北面。晏然受之矣。舜攝位八年之時。舜尙見帝。帝

館甥于貳室。亦饗舜。迭爲賓主。今謂堯北面朝舜。舜南面而立。則是居堯之宮。偁堯爲臣。而以禪爲篡乎。史稱孟子退而與萬章之徒敘詩書述仲尼之意。作孟子七篇。咸邱蒙苟曾讀尙書。豈有不知堯崩在舜未卽位以前。安有舜旣天子而堯尙北面朝者。豈不知舜五十卽居瞽瞍之喪。孺慕終身。安有舜爲天子瞽瞍尙存者。何乃引率土之濱莫非王臣。以舜旣爲天子而瞽瞍不臣爲異事。是必父拜子坐而後情安理得。父不拜子。則爲異事。直乃天地易位。罪不容誅。孟子門下有此梟獍。乃不斥諸門牆之外。是宰予不過短喪。夫子尙呵而責之。咸邱蒙必欲以子臣父。乃不鳴鼓而攻之。尙且登其言于七篇。置之五教答問之列。不知後車數十乘從者數百人。所爲何事。豈有不讀一經不識一義。惟知庾屨鋪啜爲事乎。聖門七十子。于柴愚參魯由喭師辟。皆時時提誨如不及。甚至門人厚葬顏淵。子路使門人爲臣。尊師篤友之誼甚美。而夫子責以欺天。而孟子則樂正子而外。如景春則淡公孫衍張儀爲大丈夫。公孫丑而以管晏之功夫子當路于齊不敢復許。其垂涎嚮韶之意形諸詞色。不知所學何道所爲

何事乎。孟子門人惟樂正子一人。此外皆不堪問。是以軻死不得其傳焉。其以此乎。

桃應問曰。舜爲天子。皋陶爲士。瞽瞍殺人。則如之何。爲孟子者。告以瞽瞍頑瞽之時。焚廩浚井。皆不能殺。大杖則逃。求之則未嘗不在側。一子且不能殺。安能殺人。當舜三十徵庸被舉之時。已言克諧以孝。烝烝乂不格姦。其後瞽瞍底豫。舜祇載見瞽瞍。夔夔齊栗。是瞽已化爲慈父。安有卽位後復殺人之事。卽以有時誤殺左右。尙有議親譴貴之典。此問之最無難答者也。乃忽告以竊負而逃。遼海濱而處。瞽能往。皋亦能往。是舜父子皆將死於皋陶之手。尙欲終身欣然樂而忘天下。是何孟子言論異於孔子者若斯。支離不可思議。一至此乎。毋乃戰國小人妄爲此說。竄入七篇。以敗我大賢之門戶。後人不審。視同謨訓。烏乎。此韓子所以言識古書正僞之難也。

論語論治。止言足食足兵民信。而聖人期月可三年成。所以立動綏和。亦莫由知其所以然。其告顏淵爲邦。夏時殷輅周冕韶樂。乃治定功成制作之事。中庸

言爲天下國家有九經。而懷諸侯柔遠人。亦成周盛時之治。惟孟子言王道曰。田里樹畜是也。庠序學校養老明倫是也。其在朝廷。則尊賢使能俊傑在位是也。其于用兵。則曰天時不如地利。地利不如人和是也。而曰善戰服上刑。連諸侯者次之。闢草萊任土地者次之。又曰。我能爲君約與國戰必克。今之良臣古之民賊。然若吳起樂毅李牧廉頗趙奢蒙騖蒙恬之將。燕昭中興再造破齊七十餘城。齊襄田單守卽墨走田劫。盡復七十二城。趙武靈之爲君。胡服騎射。外服匈奴。破其十萬衆。使不敢南牧。又假爲趙使而見秦王于咸陽。欲從雲中直襲秦。其後秦始皇欲滅楚。王翦謂非六十萬人不可。是此數強國豈可不煩兵力而服者乎。計七國命世之才。惟信陵君有王佐器。故漢藝文志傳有信陵君兵法。其始以選兵八萬救趙。一戰而走蒙騖。全邯鄲。旣而秦聞公子留趙十年。急攻魏。信陵君歸救魏。遣使告燕趙齊韓各國出兵。各國皆怨秦。及聞公子自將。皆願助師。公子將五國之兵大破秦師。秦師固守函關而不敢出戰。使公子不聽魏王之召。益約燕趙齊楚之師。或由雲中或由夏陽渡河以入咸陽。而自

七十子微言大義。易則施孟梁邱。皆能以占變知來。書則大小夏侯歐陽兒寬。皆能以洪範匡世主。詩則申公轅固生韓嬰王吉韋孟匡衡。皆以三百五篇當諫書。春秋則董仲舒雋不疑之決獄。禮則魯諸生賈誼韋元成之議制度。而蕭望之等。皆以孝經論語保傅輔道。求之東京。未或有聞焉。其文章述作。則陸賈新語。以詩書說高祖。賈誼新書。爲漢定制。春秋繁露。尙書大傳。韓詩外傳。劉向五行。楊雄太元。皆以其自得之學。範陰陽。矩聖學。規皇極。斐然與三代同風。而東京亦未有聞焉。今世言學。則必曰東漢之學勝西漢。東漢鄭許之學。綜六經。嗚呼。二君惟六書三禮。並親諸經。爲閎深。故多用今文家法。及鄭氏旁釋易。詩書春秋。皆創異門戶。左今右古。其後鄭學大行。駿淫遂至易亡。施孟梁邱。書亡。夏侯歐陽。詩亡。齊魯韓。春秋鄒夾公羊穀梁。半亡半存。亦成絕學。讖緯盛。經術卑。儒用紉。晏廩預讖。隨之徒。始得以清言名理。並起持其後。東晉梅賾。僞古文書。遂乘機竄入。並馬鄭亦歸於淪佚。西京微言大義之學。墜於東京。東京典章制度之學。絕於隋唐。兩漢故訓聲音之學。熄於魏晉。其道果孰隆替哉。且夫

文質再世而必復。天道三微而成一著。今日復古之要。由詰訓聲音以進於東京典章制度。此齊一變至魯也。由典章制度以進于西漢微言大義。貫經術故事文章於一。此魯一變至道也。道光商橫攝提格之歲。源既敍錄武進禮曹劉申甫先生遺書。略陳羣經家法。茲乃推廣徧集兩漢儒林傳藝文志之文。凡得周易今文家。施氏學第一。梁邱學第二。孟喜氏學第三。孟氏學旁出京氏焦氏第四。周易古文家。費氏學第五。其流爲荀氏卦氣之學。鄭元爻辰之學。此外又有虞翻消息卦變之學。斯爲易學今古文傳授大概也。尙書今文列于博士者。有伏生歐陽大小夏侯二十八篇之學。有孔安國古文四十餘篇之學。至東漢初劉歆杜林衛宏賈逵馬融鄭康成又別創古文之學。其篇次與今文同。而孔安國佚十六篇仍無師說。此皆不列於博士者。及東晉僞古文及僞孔傳出。唐代列於學校。而伏歐之今文。馬鄭之古文。同時並亡。予據大傳殘編。加以史記漢書諸子所徵引。共成書古微。斯尙書今古文傳授大概也。詩則漢初皆習齊轅固生魯申公韓嬰三家。惟毛詩別爲古文。鄭康成初年習韓詩。及箋詩改從

毛。于是齊魯韓次第佚亡。今惟存毛傳。及宋朱子王與麟始略采三家詩殘文而未得條緒。明何楷本朝范家相桐城徐璈次第蒐輯。始獲三家詩十之七八。而余發揮之成詩古微。此詩今古文大概也。小學以說文爲宗。歷代罕究。國朝顧炎武始明音學。而段王二氏發明說文廣雅。惟轉注之說尙有疏舛。予特爲發明之。此小學家之大概也。禮經則禘祫之義。王肅與鄭元抗衡。鄭主緯書。惑生五帝之說。肅主人帝爲始祖所自出之帝。輸攻墨。一本墨下有守字秦固失之。楚亦未得。而鄭元周禮注計口出泉。至宋遂啟王安石新法之禍。惟宋朱子纂儀禮經傳通解。分家禮邦國禮王朝禮喪祭禮。合三禮爲一書。集三代古禮之大成。又欲采後世制度因革損益以擇其可行。國朝讀禮通考五禮通考實成其志。此則古今三禮之大概也。今采史志所載各家立案于前。而後隨人疏證。略施斷制於後。俾承學之士法古今者。一披覽而羣經羣儒粲然如處一堂。識大識小。學無常師。以爲後之君子亦將有樂于斯乎。

學校應增祀先聖周公議

謹案禮記文王世子。凡入學者必釋奠於先聖先師。鄭康成註曰。先聖謂周公。先師謂孔子。考禮記出於周魯之儒。鄭氏註在東漢之世。則是周漢時已皆祀周公爲先聖。孔子爲先師。下及唐宋。均無啟聖殿之祀。其祀啟聖者。始於元世。而明代因之。我朝雍正間。始加封王爵。其實史記孔子世家及左傳孟懿子之言。皆止謂孔子祖爲正考甫。生孔父嘉。嘉生防叔。始去宋家於魯。防叔生伯夏。伯夏生叔梁紇。統爲五世。初無木金父。墨夷父二世。此二世出於王肅僞家語。不可爲典要。卽啟聖四世之祠。亦止宜祀於闕里孔氏家廟。由衍聖公奉祀。其於天下各省郡邑。學校崇文。敷教之誼。無當也。是以本朝列聖祀學。止拜先師。而無拈香啟聖殿之事。各省學政。地方官。丁祭及朔望行禮。皆止詣大成殿。而無祀啟聖殿之事。旣同虛設。曷謂尊崇。考學校所崇五經。易詩書禮。皆原本於周公。而述定於孔子。如周易之六十四爻。皆作於周公。而傳與於孔子。詩之雅頌南風。皆出於周公。而正樂於孔子。書之周誥。固出周公。而典謨虞夏之書。亦周史箴之。而孔子編定之。至於周禮儀禮及二戴所記禮儀三百威儀三

千。尤皆出周公一聖之手。惟春秋因魯史之舊而筆削於孔子耳。故夫子自言述而不作。蓋作者之謂聖。述者之謂明。孔子一生夢周公而師文王。文王已在歷代帝王祀典之列。則以師道兼治道者。惟周公孔子而已。孟子以周公與大禹爲三聖。唐韓愈原道篇曰。由周公而上。上而爲君。故其道行。由孔子而下。下而爲民。故其說長。今天下不獨學校所誦習皆周公經典。卽上而朝廷制度六官分治。皆周禮冢宰司徒宗伯司馬司寇司空之職。且太常所奏樂舞。皆周官大樂正之遺。上自壇廟下及郡國所行吉凶軍賓嘉五禮。皆周公之制。及欽天監測算儀器。皆周官土圭挈壺保章及周髀算數之遺。所用典籍符印文字。皆周官保氏六書之體。中庸所謂車同軌書同文行同倫。雖有其位。苟無其德。不敢作禮樂焉。雖有其德。苟無其位。亦不敢作禮樂焉。洵乎非德位皆隆如周公者。不足當之矣。國家崇德報功。凡歷代有功德於民者。皆列祀典。況以三大大聖在孔子之前。創萬世禮樂之制。朝野無不遵行。而學校祭祀俎豆不及。豈非一大缺典爲人心所不安乎。且古制本以周孔並崇。今應請於朝廷

復周漢之制。卽以天下學宮之啟聖殿。爲先聖殿。中供先聖周文公之神位。恭請御書祖述憲章四字匾額懸之中央。每歲春秋丁祭止增一牲幣。地方官朔望行禮。止多一拜跪。不動一椽而崇德報功盡美盡善。從此禮樂教化之源。與日月昭而天地悠也。豈非一朝盛事。必當興舉者歟。其啟聖五王木主。宜用櫝藏恭貯於尊經閣。至於從祀。則其從祀於先師者。卽其從祀於先聖者也。束髮鼓篋。涵詠聖涯。昧昧我思。葵牆在望。不登朝列。無望颺言。敬撰斯誼。以俟來哲。

古微堂外集卷一終